

दिनांक 10.12.2025

समय: 18.45 बजे

- जयपुर मांय आज प्रवासी राजस्थानी दिवस रो कार्यक्रम राख्यी ज्यो-मुख्यमंत्री भजन लाल शर्मा कह्यो-प्रदेश री विरासत, संस्कृति अर बुनियादी ढांचो इण री न्यारी ओळखाण बणावे है।
- गृहमंत्री अमित शाह विपख माथे एसआईआर रा बारा मांय भ्रम फैलावण रो आरोप माण्ड्यो।
- दीपावली रा त्यौहार ने यूनेस्को इन्सानियत री अमूर्त सांस्कृतिक विरासत सूची मांय शामिल कीनो।
- जयपुर रा जवाहर कला केंद्र मांय काल जयपुर टाइगर फेस्टिवल सरू व्हेला।

000

जयपुर मांय आज प्रवासी राजस्थानी दिवस कार्यक्रम राख्यो जा रह्यो है, जिण मांय देश-परदेश ऊँ आया प्रवासी राजस्थानी भाग ले रह्या है। कार्यक्रम मांय राज्यपाल हरिभाऊ बागडे, पंजाब रा राज्यपाल गुलाब चंद कटारिया अर मुख्यमंत्री भजनलाल शर्मा समेत केई केंद्रीय मंत्री, राज्य मंत्रिपरिषद् रा सदस्य, केई नामी उद्योगपति, देश-परदेश ऊँ आया प्रवासी राजस्थानी अर मान्योड़ा लोग मौजूद रह्या। ई मौके राज्यपाल हरिभाऊ बागडे प्रवासी राजस्थानियां ऊँ मायड़ ज़मीं रो कर्ज चुकाता थकां प्रदेश मांय बत्तो ऊँ बत्तो निवेश करण री अपीली कीनी। कार्यक्रम मांय मुख्यमंत्री भजन लाल शर्मा कह्यो के राजस्थान संभावनावां रो प्रदेश है जठे करोबार री मोकळी संभावनावां है। श्री शर्मा कह्यो के देश अर दुनिया मांय नाम कमावण वाळा प्रवासी राजस्थानी हमेशा जडां ऊँ जुड्या रह्या है। वे प्रवासी राजस्थानियां ऊँ राज्य मांय निवेश करण सारू सरकार री ओर ऊँ हर संभव मदद रो भरोसो दिरायो।

.....

कार्यक्रम मांय केंद्रीय उद्योग अर वाणिज्य मंत्री पीयूष गोयल राजस्थान ने रीति-रिवाज़, आधुनिकता, विकास अर विरासत रा संतुलन वाळो राज्य बतायो। वे कह्यो के राजस्थान री सब ऊँ मोटी ताकत नौजवानां री बडी तादाद है, ज्यीं रे पाण राज्य तेज़ी ऊँ आगे बढ़ रह्यो है।

.....

ई मौके पंजाब रा राज्यपाल गुलाब चंद कटारिया कह्यो के राजस्थान रा विकास मांय प्रवासी राजस्थानियां रो योगदान ऐतिहासिक और अनुकरणीय रहा है। कार्यक्रम मांय वेदांता ग्रुप रा चेयरमैन अनिल अग्रवाल कह्यो के राजस्थान री धरती हेटे लुक्योड़ो खनिज भंडार आखा देश ने ऊर्जा, धातु अर कुदरती साधनां रा हलका मांय खुद रे पाण ऊबो करण रो बूतो राखे है। टाटा पावर रा सीईओ अर एमडी प्रवीर सिन्हा कह्यो के राज्य मांय सूरज री रोशनी ऊँ 800 गीगावाट अर हवा रा वेग ऊँ 200 गीगावाट बिजली बणावण रो बूतो है। कार्यक्रम रे दौरान 1 लाख करोड़ रुप्या रा निवेश प्रस्तावां ने लागू करी ज्या, जिण ऊँ राइजिंग राजस्थान समिट पाछे काम सरू व्हेवण वाळी परियोजनावां ऊँ जुड्या खर्चा री रकम बध र 8 लाख करोड़ रुप्या ताई पूग गयी है।

कार्यक्रम मांय देश-विदेश मांय खास उपलब्धियां हासिल करण परां अनिल अग्रवाल, कुमार मंगलम बिड़ला, विनीत मित्तल, अजय पीरामल, माधव सिंघानिया, पूनमचंद राठी, नरसी कुलरिया, सी.एम. मूंदड़ा अर प्रदीप राठौड़ ने 'प्रवासी राजस्थानी मान' दे र नवाज़ा। कार्यक्रम रे दौरान न्यारा-न्यारा हलकां ऊँ जुड्या सत्र ई राख्यी ज्या। सिंज्यां री पोर सांस्कृतिक संध्या राख्यी जा रही है।

000

गृहमंत्री अमित शाह विपख माथे एसआईआर रा बारा मांय भ्रम फैलावण रो आरोप माण्ड्यो है। वे आज लोकसभा मांय चुनाव सुधारां रा बारा मांय चर्चा रो जवाब दे रह्या हा। श्री शाह कह्यो के म्हाणो संविधान चुनाव आयोग ने वोटर लिस्टां बणावण रो हक देवे है अर एसआईआर मतदाता सूची मांय सुधार री प्रक्रिया है। गृहमंत्री विपख, खास तौर ऊँ कांग्रेस माथे एसआईआर रा काम मांय मदद नी करण रो आरोप माण्ड्यो।

.....

इण ऊँ पैली चर्चा मांय कांग्रेस रा नेता के.सी. वेणुगोपाल कह्यो के वोट देवण रो हक लोकतंत्र रो बुनियादी सिद्धांत है। वे निर्वाचन आयोग माथे दुभांत रो आरोप मांडयो। वे बिहार मांय वोटर लिस्टां ऊँ मोटी तादाद मांय नाम हटावण रो मुद्दो ई उठायो। दूजी कानी भारतीय जनता पार्टी रा नेता रवि शंकर प्रसाद विपख माथे हार री सूरत मांय चुनावी प्रक्रिया माथे सवाल उठावण रो आरोप माण्डयो। तृणमूल कांग्रेस री शताब्दी रॉय लोगां ने परेशान करण सारू एसआईआर करावण रो आरोप माण्डयो।

000

प्रधानमंत्री नरेन्द्र मोदी जनता ऊँ 'आपका पैसा, आपका अधिकार' अभियान मांय भाग लेवण री अपील कीनी है। सोशल मीडिया प्लेटफॉर्म लिंकडइन माथे डाली ज्यी पोस्ट मांय प्रधानमंत्री कह्यो के ओ जनता सारू भूल्योड़ी माली संपत्तियां ने नुवा मौका मांय बदळण रो अवसर है।

000

भारतीय प्रशासनिक सेवा रा रिटायर्ड अहलकार सुनील शर्मा आज राज्य सूचना आयुक्त रा ओहदा री शपथ लीनी। जयपुर रा राज्य सूचना भवन मांय राख्यी ज्या कार्यक्रम मांय राज्य रा मुख्य सूचना आयुक्त मोहन लाल लाठर वां ने पद अर गोपनीयता री शपथ दिरायी।

000

भारत रा खास त्यौहार दीवाळी ने संयुक्त राष्ट्र शैक्षिक, वैज्ञानिक अर सांस्कृतिक संगठन – यूनेस्को अमूर्त सांस्कृतिक विरासत री नुमाइन्दा लिस्ट मांय शामिल कीनो है। संस्कृति अर पर्यटन मंत्री गजेंद्र सिंह शेखावत आ जाणकारी दीनी। वे कह्यो के दीवाळी केवल मनाई ही नीं जावे है बल्कि इण ने पीढ़ियां ताई महसूस करी जावे है।

000

राष्ट्रपति द्रौपदी मुर्मू कह्यो है के भारत मानवाधिकारां री हिफाजत सागे ई वां रो मान करण वाळो देश बणबो तैय कीनो है। वे नई दिल्ली मांय राख्यी ज्या अन्तर्राष्ट्रीय मानवाधिकार दिवस अर रोजीना री ज़रूरतां पूरी करणो तैय करण रा बारा मांय राख्यी ज्या राष्ट्रीय सम्मेलन मांय बोल रही ही। श्रीमती मुर्मू कह्यो के मान माथे कोई समझौतो नीं कर्यो जा सके है अर किण ने ई वां रा हक ऊँ महरूम नीं कर्यो जावणो चाहिजे। आज विश्व मानवाधिकार दिवस रे मौके राज्य मांय ई केई कार्यक्रम राख्यी ज्या। करौली मांय महिलावां अर मजूरां रा हक रा बारा मांय कार्यशाला राख्यी ज्यी। इण मांय बराबर तन्खाह, काम करण री सुरक्षित ठौड़ां अर स्वास्थ्य अर लोग-लुगाई री बराबरी रा बारा मांय चर्चा करी ज्यी। कोटपूतली-बहरोड़ मांय ई न्यारी-न्यारी होड़ां राख्यी ज्यी। अजमेर मांय विधिक जागरूकता शिविर लगायी ज्यो।

000

देश मांय 160 रेलवे स्टेशनां ने अमृत भारत स्टेशन योजना रा तैत और बेहतर बणायी ज्या है। रेल मंत्री अश्विनी वैष्णव आज लोकसभा मांय पूरक सवाल रा जवाब मांय आ जाणकारी दीनी। वे बतायो के ई योजना रा तैत विकास सारू एक हजार तीन सौ ऊँ बत्ता स्टेशनां री पिछाण करी ज्यी है, ज्यां ने और बेहतर बणावण रा काम कर्या जा रह्या है।

वैष्णव कह्यो के अमृत भारत स्टेशन योजना मौजूदा दौर मांय रेलवे स्टेशनां ने और बेहतर बणावण री दुनिया री सब ऊँ मोटी योजना है।

000

भीलवाड़ा रा सांसद दामोदर अग्रवाल भीलवाड़ा-मांडलगढ़-लाडपुरा हाई-वे ने दो लेण ऊँ बधा र चार लेण रो बणावण री मांग कीनी है। वे आज लोकसभा मांय कह्यो के फिलहाल दो लेण री सड़क व्हेवण रे कारण आवण-जावण मांय परेशानी व्हे है।

000

जयपुर रा जवाहर कला केंद्र मांय काल जयपुर टाइगर फेस्टिवल सुरू व्हेला। 14 दिसंबर ताई चालण वाळा ई फेस्टिवल रो राज्यपाल हरिभाऊ बागड़े उद्घाटन करेला। फेस्टिवल मांय संवारे 10 ऊँ रात 9 बज्यां ताई फोटो-स्केच प्रदर्शनी, वर्चुअल शो, कहानियां सुनावण, पंचतंत्र कथावां, साहित्यिक संवाद, सांस्कृतिक प्रस्तुतियां अर ओपन स्टेज समेत केई खास सत्र राख्या जावेला। ई सागे ई बाघां ने बचावण, एथिकल सफारी, कुदरत ऊँ प्रेम करण अर जिम्मेदार सैर-सपाटा सरीखा खास मुद्दां माथे चर्चा करी जावेला। ई सागे ई जंगली जिनावरां ने बचावण रा हलका मांय खास काम करण वाळी हस्तियां रो ई मान कर्यो जावेला।

000

राजस्थान लोक सेवा आयोग रा भवन माथे सूरज री रोशनी ऊं बिजली बणावण री अढ़ाई सौ किलोवॉट बूता री मशीनां लगायी ज्यी है। आयोग रा अध्यक्ष उत्कल रंजन साहू अजमेर मांय आज इण रो उद्घाटन कीनो। त्ळे रा सचिव रामनिवास मेहता आ जानकारी दीनी। वे बतायो के आं मशीना ऊं हर महीना 30 ऊं 36 हज़ार यूनिट बिजली बण सकेला। ई सागे ई आयोग रो बिजली रो बिल शून्य व्हे जावण सागे हर महीना तीन ऊं साढ़े तीन लाख रुपया री बचत व्हेला। आयोग रा अध्यक्ष साहू कह्यो के ओ काम दूजा सरकारी महकमां सारू आदर्श बणेला, जो राज्य ने प्रदूषण मुक्त ऊर्जा हब बणावण ओड़ी खास जतन है।

000

पूर्वोत्तर दूरदर्शन राजभाषा सम्मेलन आज सिरौही ज़िला रा आबूरोड़ मांय सरू व्हयो। दूरदर्शन महानिदेशालय अर जयपुर दूरदर्शन री ओर ऊं राख्यी ज्या दो दिन रा ई सम्मेलन रो मकसद राजभाषा हिंदी काम लेवण ने बधावो देवणो है। दूरदर्शन रा महानिदेशक के. सतीश नंबूदरीपाद उद्घाटन समारोह मांय खास पावणा रा तौर ऊं शामिल व्ह्या। जळसा मांय दूरदर्शन रा अपर महानिदेशक वेदप्रकाश अर आखा देश ऊं आया अहलकार ई शामिल व्ह्या। पहला दिन रा न्यारा-न्यारा सत्रा मांय सरकारी कामकाज अर दूरदर्शन नेटवर्क मांय हिंदी काम लेवण रा बारा मांय विगतवार चर्चा करी ज्यी। सम्मेलण मांय काल ई भांत-भांत रा सत्र अर कार्यशालावां राख्यी ज्यी।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय 28 दिसम्बर दीतवार ने विचार बतावेला। आ ई कार्यक्रम री 129वीं कड़ी व्हेला। ई सारू आप ई मुफ्त नम्बर 1800-11-7800 माथे राय दे सको हो।

000